

又下教于政院曰啓運宮症候日益危重予心憂感曷有其極欲禱于山川以冀冥祐未知如何寡昧已在此位遣官祈禱似無不可問于禮官以啓又令該曹審理滯獄疏釋輕囚俾無冤枉禮曹啓曰古之孝子親有疾病則或焚香祝天或禱于鬼神皆出於至情之所發今者啓運宮症候危重自上憂遑悶迫之情為如何哉遣官祈禱于山川恐無不可敢啓上曰速為舉行○行禱于名山大川命招知製教李植等四人于闕下製文以送○甲戌夜白雲一道如氣起自坤方指艮方長竟天有氣如火光○十二月朔乙亥○丙子領議政李元翼左議政尹昉右議政申欽上劄曰啓運宮症勢尚未向蘇伏想聖明侍藥憂遑已過時月神思內焦寢膳外減誠孝所極不覺玉體損傷臣等竊伏思惟悶迫之情罔知所達殿下一身乃宗社臣民之所托豈可自輕天時凝沍六氣易乘倘有不安節之候則其於侍藥亦必有未能盡意伏願倍加慎重以副羣下之望 荅曰劄辭當留念焉○丁丑初學趙相禹上疏不報其疏曰端本清源者春秋之義也其源其本不端不清則倫紀大紊君臣父子之道不得明焉臣竊聞之同樞臣金長生前郡守臣朴知誠曾於殿下即位之初同在一臺以殿下稱大院大君或考或叔或以綾原君主殿祀事或以殿